



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

CP Radhakrishnan-i tatong Tir
tenangzükba agiogo

Brazil indang taoba tir
Bolsonaro küm 27 tepuokdak ayutsü

VOL. XXII ISSUE NO. 330 (ADOK 330) DIMAPUR KÜPTOKNÜ (SATURDAY) RONGJUI (SEPTEMBER) 13, 2025 ₹ 5.00

NH-29 anenbanga lir; Traffic tetuyuba agütsür

Dimapur, September 12, 2025 (TYO): Honibar nikongdang tzünglu kanga arudang NH-29 nung anentsüh alua lir aser iba ajanga gari senzütsü noktanga lir.

Brihostibar nikongdang Dimapur-Chumoukedima-Kohima lenmang nung tesem asem nung anentsüh alua lir. Anentsüh agi gari ka raksatsüba dak nisung yiruba osangbo kecha mali ta traffic police-i metetdaksüogo.

NHIDCL-i anentsüh aluba tesemtem nung gari lenmang lapoktsü atema machine tem bener aruogo ta osang angazüker. Ketdangsürtemi osang tejanga magütsü tashi senzusenbongertem iba lenmang nung mesenzüi atatsü metetdaksüogo.

Maneni, Chumoukedima Deputy Commissioner Polan John, NCS-ia taonung sangdong

ka nung Traffic Advisory ka agütsüogo.

NH29, Tsiedukhru (Pagla Pahar) nung tesem aika nung anentsüh alua aliba ajanga Chumoukedima aser Kohima tsüngda senzürtemi tsünglanglen agüja ama senzütsü metetdaksür ta Chumoukedima DC-i ashi.

Light Vehicles: Chumoukedima Town (Old Check Gate) nungi Old Chumoukedima Village Road ajanga New Chumoukedima len senzütsü.

Heavy Vehicles: 7th Mile - Pimla - Mhainamtsi - Medziphema - Kohima lenmang ajanga senzütsü.

Tanga tetuyuba ka magütsü tashi NH29 nung Chathe Bridge nungi New Chumoukedima lenmang shibanga atatsü ta Chumoukedima DC-isa metetdaksüogo.

PM Modi-i tanü Manipur semdang

Guwahati, September 12, 2025 (Agencies): Manipur nung May 2023 nungi kin o kin tsüngda mepetmesü adoka raratsü tenzüker Prime Minister Narendra Modi-i asüng mezüng atema Manipur semdangtsü ta chief secretary-i metetdaksü.

"Asüng anüngdang 12:30 ako meta PM Modi-i Aizawl, Mizoram nungi Churachandpur district-i arutsü. Idakji pai Meitei o Kuki nunger raradang pei talidak toksür aoertem den ajurutepe sensaksemtsü" ta Manipur Chief Secretary Puneet Kumar Goel-i Hokolbarnü ashi.

"PM Modi-i Rs 7,300 crore alang mapatongtem atema lung

azüngtsütsü aser Peace Ground nung lokti sentong ka nung o jembitsü" ta Goel-isa ashi.

PM Modi-i Churachandpur semdangba ya kanga tongtipang kechiyong mepetmesü adokdang iba district nung kanga mejungi kongshia liasü.

Churachandpur nungi Prime Minister Modi-i nikongdang 2:30 ako meta Imphal-i arutsü aser Rs 1,200 crore alang mapatongtem sayatsütsü. Paisa lokti sentong ka nung o jembitsü. Churachandpur ya Kuki nunger teimba ser aliba district ka lir aser Imphal nung Meitei nunger teimba lir.

(Maneni tapak 8 nung...)

UNC-i Manipur nung 'trade embargo' anena atar

Imphal, September 12, 2025 (Agencies): State sorkari mepishiba sülen Manipur nung United Naga Council (UNC)-i Naga nunger alidak 'trade embargo' khen atema agiena ataba metetdaksüogo. Brihostibar nikongdang 6:00 ako nungi talenba salatsüogo.

Naga nunger tesemtem nung Indo-Myanmar arrtsü atsüdagba anema UNC-i shishilembabaren mokdanga liasü aser iba atema Manipur sorkari Bodbarnü UNC dangi temepishiba shidi ka zülü. Sorkarisa UNC dang iba onük olemteptsü jaoka liasü.

Sorkar nungi shidi anguba sülen UNC-i Senapati district kübok Tahamzam nung Emergency Presidential Council senden ka ayonga amen aser idangji temepishiba onük benoka lemsatep.

"Sorkari tesüiba nung Ministry of Home Affairs den sendentem amenba bilemtetba atema EPC-i tenüngsang agütsür. Arrtsü atsüdagba mapa meinyakdang UNC aser sendaktepa alirtem den asüngdangyatsü ta sorkari nangzükba agizüker" ta UNC-i sangdong ka nung metetdaksü.

Sorkari nangzükba onüktem nung ajemdaker UNC-i khen atema trade embargo anena atatsü lemtetogo.

UNC-i ashiba onüktem Centre sorkari agizükogo aser Ministry of Home Affairs-i maneni sendaktepa alirtem den olemteptsüta Manipur chief secretary Puneet Kumar Goel-i osang jangjashitsü.

UNC, Centre, aser state sorkar tsüngda asüngdangteper taruba olemtep alitsü ta paisa ashi.

RMSA-2016 tesayurtemi lumia lungkak aittsü renema lir



Kohima, September 12, 2025 (TYO): Nagaland RMSA Teachers Association (NRMSATA)-2016 tesayurtemi tanü agi anogo pungububa lungkak aitogo aser parnoki lumia lungkak aittsü renema lir ta shiogo.

"Sorkari 2010-13 batch tesayurtem nem agütsüba ama onok nem itasen magütsü tash lungkak aitba manentsü" ta NRMSATA-2016 spokesperson Renbemo L. Patton-i ashi.

Sorkari Supreme Court review petition anendaka aliba ka tetshia iba onük atsülangtsü meranger aser iba ya parnoki onok akhangba senzuka yutsütsü atema asaa inyaker ta pai ashi.

"Onoki akhangba onüktem

magizütsü tashi onoki lungkak aittsü. Züngsem aikati lumia lungkak aittsü mulunga aliba shiogo" ta paisa ashi.

Sorkari mapa teinyaktsü tim meinyakba atema tesayurtem mepelar ta NRMSATA President Imlitemjen Imchen-ia ashi.

"Iba tebilemtsü ajurur joko küm tenet süiogo aser okadak benokba sülen ita tenet ajunger saka sorkari angatetteptsü melena onok ano okadaki anir onür" ta pai ashi.

"Ketdangsürtemi lemtet tajung ka agitsüla, onoki lungkak ait tenzüker tanü hopta ka ajunger aser onoki Honibar aser Deobar lungkak aitba anena atatsü aser Hombar nungi tenzüksü" ta NRMSATA President-isa metetdaksü.

Onoki olemteptsü mulunga dang lir aser sorkari Ministry of Human Rights Development aser National Council of Teachers Education telatetbatem ama tesayurtem regularize asütsüla ta paisa shisem.

Sorkari Supreme Court nung review petition angadanga sülen ang mapa inyaktsü ta nangzükba nung temulung masür ta Imlitemjen-isa ashi.

Brihostibarnü Commissioner & Secretary of School Education Kevileno Angami den Mission Director Samagra Shiksha Nagaland L. Jamithung Lotha aser tongti ketdangsürtemi Nagaland RMSA-2016 Teachers Association den senden ka amen saka idangji tangatettep kati marutet.

NDPP CEB-i NPF den lokteptsü mulunger; General Convention jazüksü

Dimapur, September 12, 2025 (TYO): September 12, 2025 nü Nationalist Democratic Progressive Party (NDPP) Central Executive Board (CEB)-i NPF den lokteptsü mulunga agizükogo.

NDPP Central Headquarters, Kohima nung tan senden amendang NDPP President Chingwang Konyak aser Chief Minister & NDPP Parliamentary Board convener Dr. Neiphu Rio nati anir züngsem ajak aden.

Naga Peoples Front (NPF) Central Executive Council (CEC)-i bangzüng renemba aser NPF Secretary General-i NDPP President dangi züluba shiditem olemteptsü atema tanü senden

ayonga amen.

Senden nung NDPP President, Chief Minister aser Secretary General nungeri iba dak sendakba osangtem tejanga lemsatepa liasü.

Külen, Minister G. Kaito Aye-i NDPP MLA tem tenüng nung senden nung adenertem dang Parliamentary Board ajanga NPF-i ashiba pelashishia agizükba metetdaksü aser item osang nung ajemdaker NDPP Central Executive Board (CEB) züngsemtemi NPF den ka küma lokteptsü mulunga agizük.

NDPP ya Election Commission of India nung register süa aliba aser agizükba political party ka asünung NDPP

Constitution nung lateta aliba ama inyaktsüla. Anungji CEB-i NDPP indang General Convention ka ayonga idakji tatembang lemtet ka agitsü telemteba agi.

Iba General Convention atema CEB züngsemtemi President aser Chief Minister nati telemteba agitsü tashi agütsü.

Secretary General Abu Metha menden ser amenba CEC senden nung Central Frontal Organizations ajak nungi presidents, Central Committees ajak nungi Conveners aser Region ajak nungi Presidents, Working Presidents aser General Secretaries aden.

ANCSU-i Scholarship Nodal Cell lapoktsü nenshir

Dimapur, September 12, 2025 (TYO): Nagaland state Cabinet-i lemtetba ama anogo 27 tsüngda Scholarship Nodal Cell balaka tentettsü akhangba agizükba atema pelar ta All Nagaland College Students Union (ANCSU)-i metetdaksüogo.

Chief Secretary lenisüba kübok Scholarship Nodal Cell

atema latettsüba mapang tsüngda telangzükba agütsüba ateman pelar aser state sorkari Directorate of Higher Education kübok SNC maparen nendaka inyaktsü imlar ta ANCSU president Tenyesinlo Bukh aser General Secretary Kivinoka A Sema nati sangdong ka nung ashi.

ANCSU-i iba mapa nung

maneni tenük yoktsü aser state sorkar o scholarship mapa inyakba department temi SNC asoshi permanent officials shimoktsü atema tatemtsü magütsütsü metetdaksür. SNC mapa tenzüksüla aser atsülangra onoki ozüngi melaba ama lungkak aittsü ta m e n d e n p u r t e m i s a metetdaksüogo.

Kohima nung NCAP indang workshop ayongzüka agi



Dimapur, Rongjui/Sept. 12 (TYO): National Clean Air Programme (NCAP) indang workshop ka September 12, 2025 nü Deputy Commissioner, Kohima indang Conference Hall nung ayongzüka agia liasü. Iba sentong ya Kohima District Administration ajanga Kohima Press Club (KPC) den lungjemer KPC indang küm tepiyong Silver Jubilee benjongmung nung shilem ka ama agia liasü.

Deputy Commissioner, Kohima, B. Henok Buchem, NCS ajanga iba sentong ayongzüka nukjidadong lemsatepdang KPC küm 25 ajungba tenüsang agütsü aser mopung temürek atema awareness agütsütsü asoshi lungjemba atema pelaba lemsatepa liasü.

Paisa langa aliba aser jangra aliba kaketshirtem asoshi Deputy Commissioner's Initiative "One day with Deputy Commissioner" tenzüka indanga lemsatepa liasü, koba kasa anogo tenzüka Dr. N. Kire Government Higher Secondary School nungi

mezüng batch shilem agia liasü.

Tanü ya lokti ka adenshiba kisüng masü saka jila nung osangbener nungi kaketshirtem tashi techirartem senden ka lir, ta pai ashi aser Kohima ya küm 146 tain aser Naga nunger ajunga asoshi talidak ki ama kumogo ta shisem.

Libajen meraksar ketdang asütsü tongtipang ta angatetdakja, India nung national standards matongba "non-attainment cities" 131 nung Kohima ya ka lir, ta pai ashi.

Mopung menenba anema "natural allies" ama inyaka arem aser yangji aliba takum sangnu wazüka ayutsü asoshi urbanization kanga junga ketdang asütsüla, ta Kohima DC ajanga ashi.

Buchem-i media dang osang abenba aser awareness agütsüba nung tongti shilem agütsü ayongzüka liasü.

"Media ya asen nüburtim indang tanüdagtsü aser shisatsü wazüka ayur ka lir. Nenok ya terepranger kisüng masü, temelenshi arudaktsür lir, nenoki osang abenba ajanga

nüburtim tangatetba melenshitsür, ochi nüngdaker aser kumdanga alitsü yimya adokdaktsür," ta pai ashi.

Nüburtim libaliru melenshitsü asoshi awareness agütsütsü osangbener ayongzüka den jana tapi agi indokba, lenmang nung ki o jen yangluba oset indokba, ayong tem nung septic waste chiokba amala yimya ajanga asen temeket menentsür, ta pai ashi.

Pai akok tashi tetsüng agi jajatsü mesüra cycle nung senzütsü, carpooling aser jana kanga kumdanga indoktsü ayongzüka liasü.

Public transportation aser electric vehicles amshitsü atema nüburtim nem awareness agütsütsü pai osangbener ayongzüka liasü.

Kohima indang mopung ya arok senmang lir. Aji kumzüka ayutsü asoshi policy ka mesüra mapang kaka campaign ayongzüka agiba ajanga meperitsü. Ibai takum nung yimya ka ama amshitsüla, tanen makai nisung ajaki inyaksüla, ta ashi.

(Maneni tapak 8 nung...)

Tuli nung sorkar ketdangsürtem senden amen



Dimapur, Rongjui/Sept. 12 (TYO): Tuli Sub-Division kübok Heads of offices ajunga indang Sub-Divisional Coordination meeting ka September 11, 2025 nü Dobashi Court, Tuli nung mena department balalai terenlok maparen inyakba osang agüja liasü.

Rural Development Department ajanga ashiba agi, Tuli Block nung tang Panchayats 12 lir, MNREGA Scheme kübok job cards 2,118 lir aser financial year 2025-2026 mapang mapa inyakba anogo 48,176 liasü. NSRLM sentong kübok block nung küm ti tsüngta targeted rural household shilem 80 takok angu aser Self-Help Groups 113, Village Level

Organisations 13 aser Block Level Federation ka takok ngua temaba jenjangi ajungkettsü, ta ashi.

Sub-Divisional Agriculture Officer ajanga osang agütsüba nung, PM-KISAN kübok blocks asem awajema lir ta ashi. Chuchu Block nung PM-KISAN kübok tenüng zülüoka aliba aluyimer 964, Changtongya Block nung 792 aser Tuli Block nung 997 lir. Ano NMEO-Oil Palm scheme kübok aluyimer kibong 50 dak temai ali hectares 90 shi nung oil palm lu ayimer, aser parnok nem ali renemba, machineries alitsü aser drip irrigation facilities inoktsü asoshi senotsü teyari agütsüogo ta ashi.

JICA-i yarisema Nagaland

Forest Management Project kübok Merangkong yimdak ali 427.48 hectares nung süngtong 90,168 temogo, ta Forest Range Office, Tuli ajanga senden nung metetdaktsü.

Ano Nagar Van Yojana Scheme kübok 2024-2025 mapang educational aser südoksünemtsü atema Nagar Van Tuli College nung süngdong 2,000 shi atem ta ashi.

CHC Tuli indang Medica Officer ajanga azü agi anguba, tuberculosis aser lenmang nung gari lendong ajuruba tali akumba indang tebilemstü lemsatepa liasü. Ajisüaka tesüiba küm pongu nungi trok tsüngta subdivision nung ramen agi shiranger kata meliasü, ta ashi.

DoSE-i tsürabur maliba tanur tenüng bendentsü metetdaktsür

Dimapur, Rongjui/Sept. 12 (TYO): Department of School Education, Nagaland ajanga NGOs, Municipal/Town/Village Councils, Arogo, kaketshir tentet aser nüburtim dang arishi küm 1-14 tsüngta tsürabur maliba tanurtem school kecha nunga tenüng mezülüoki alir mesüra Elementary Education merenemi anena alirtem Nagaland Online Education Services Portal <https://dosenl.in> nung agüja aliba Orphan Out of School Children Data Link nung tenüng zülüoktsü ayongzüko.

Department-i special training atema sentong yanglua aser kiyong nung aliba school

tem nung tim classes nung züngsemdaktsütsü asoshi September 30, 2025 tashinung iba maparen inyaktsü ayongzüker, ta sangdong ajanga ashi.

Portal nung tenüng zülüoktsü makoker temi anasatiba Govt. Schools/DEO/Sr. SDEO/SDEO Offices nungi ketdangsürtem teyari agütsü akok, ta ashi.

DEOs/Sr. SDEOs/SDEOs / Heads of Govt. Schools ajunga dang atakzüka aliba mapang telatet nung portal nung tenüng zülüokba mapang nüburtim den yariteptsü ajungshir, ta Department sangdong ajangasa ashi.

DPDB Mokokchung ajanga district nung TB agi shiranger yaritsü



Dimapur, Rongjui/Sept. 12 (TYO): Ita shia amenba Mokokchung District Planning and Development Board senden September 12, 2025 nü Deputy Commissioner, Mokokchung indang Conference Hall nung amendang Department of Health and Family Welfare ajanga TB Elimination Programme kübok Nikshay Mitra indang PowerPoint presentation ka agüja liasü.

DTO Mokokchung, Dr. Toshila Jamir-i district nung TB agi shiranger nisung 174 lir aser Niksha Mitra teyari nüngdaker, ta ashi.

Niksha Mitra ya kija, NGOs, Co-Operative Societies, Political parties amala sütettsü, ta Dr. Toshila Jamir-i ashi. Mitra kati TB agi shiranger tajemba agi ka ita trok tashi adopt süa shiranger nem pei mulungba agi yaritettsü.

Iba mapang MLA & Chairman DPDB, Mokokchung, Nuklutoshi Longkumer-i züngsemtem dang TB agi shiranger ka-ka danga adopt asütsü ayongzüker aser paia TB agi shiranger nisung pongu adopt asütsü sangdong aser kasaji Deputy

Commissioner, Mokokchung, Ajit Kumar Verma, IAS-ia TB agi shiranger nisung pongu adopt asütsü sangdong.

District nung Niksha Mishra donors ama asütsü tenüng aruba Department indang osang taruba DPDB senden nung repringteptsü lemteta liasü.

Assam aser Nagaland arütsü len tensa koma lir ta DPDB chairman-i asüngdangba nung ajemdaker Addl. Superintendent of Police, Mokokchung, Y. Tumchobemo Yanthan-i senden nung alirtem dang District Administration aser Police department ajanga mera balala agiba indang lemsatep aser status quo amshitar aser district nung arütsü tebilemstü tazüokba nung lir ta ashi.

Deputy Commissioner, Mokokchung, Ajit Kumar Verma, IAS ajanga district nung Head of Offices tem dang block aser subdivision nung par kübok aliba offices tem mapang shia semdangtsü ayongzüka liasü aser tarutsü nung iba ama mapa inyaksangshiba osang meshitsü ta ashi.

(Maneni tapak 8 nung...)

Chümoukedima nung "Aadi Karmayogi Abhiyan" indang orientation alitsü

Dimapur, Rongjui/Sept. 12 (TYO): "Aadi Karmayogi Abhiyan" campaign dak sendakba nung nüngdakba departments, CSOs, District Master Trainers (DMTs)-i anir Area Administrative officers atema District Level Orientation sentong ka Deputy Commissioner, Chümoukedima indang Conference Hall nung September 15, 2025 nikongdang 1:00 ako nungi agütsü, ta Deputy

Commissioner, Chümoukedima, Polan John-i sangdong ka nung metetdaktsü.

Tribal areas nung last mile service delivery agütsüba nung asendenshitsü asoshi Aadi Karmayogi Abhiyan campaign ya Government of India-i tenzü.

Iba sentong nung Heads Offices ajunga den department shia nungi ketdangsür teperi arua adentsü metetdaktsür, ta sangdong ajanga ashi.

CP Radhakrishnan-i tatong Tir tenangzükba agiogo



September 12, 2025 nü New Delhi nung CP Radhakrishnan-i tatong Tir tenangzükba agiba sülen Tir, Droupadi Murmu aser Ato kilonser Narendra Modi na den tangokba noksa ka angur.

New Delhi, Rongjui/September 12 (Agencies): Hokolbarnü Chandrapuram Ponnusamy Radhakrishnan-i tatong Tir tenangzükba agiogo; pa India nung tatong Tir 15buba asütsü.

Tir, Droupadi Murmu-i ketdangsüa pa nem tenangzükba agidaksü.

CP Radhakrishnan ya 1957 küm October 20 nü Tamil Nadu kübok Tiruppur nung aso. Pa tainlonglong asüba mapang nungi RSS nung aden aser BJP nung dena Coimbatore Lok Sabha menden nungi anaben takok ngua liasü.

Pa 2004 küm nungi 2007 küm tashi Tamil Nadu BJP Tir inyaka liasü. Radhakrishnan

ya Maharashtra Governor teinyakdak lia tatong Tir candidate shima liasü. Anogo ishika tejaklen pai Governor menden toktsü aser tanü tatong Tir tenangzükba agi.

Rashtrapati Bhawan nung agiba sentong nungi tawa tatong Tir menden nungi anensang Jagdeep Dhankhar aser pa kinüngtsü nata densema liasü. Iba sentong nung taoba mapang tatong Tir ana- M Venkaiah Naidu aser Hamid Ansari nata liasü.

Iba sentong nung Ato kilonser Narendra Modi, Union Home Minister Amit Shah, Defence Minister Rajnath Singh, Transport Minister Nitin Gadkari, BJP aser NDA nungi Chief Minister tema aika

aden.

Karnataka Governor Thaawarchand Gehlot, Punjab Governor & Chandigarh Administrator Gulab Chand Kataria, Jharkhand Governor Santosh Gangwar aser Heavy Industries Minister H. D. Kumaraswamy nungera liasü.

Tawa tatong Tir election nung NDA candidate, Radhakrishnan-i Opposition candidate aser taoba mapang Supreme Court judge B. Sudershan Reddy madak takok ngua liasü.

Rajya Sabha Secretary General & Returning Officer PC Mody-i, MP 781 nungi MP 767-i vote agütsü; iba nungjagi ballots 15 bo magila liasü, ta metetdaksü.

Vote maneni auyara Nepal nung atalokba ama ataloktsü: Akhilesh Yadav

Lucknow, September 12 (Agencies): Anogo ishika tejaklen Nepal nung lanurtemi longkak aيتدang nisung aika asüba sülen Ato kilonser KP Sharma Oli-i menden nungi anenba dak sendakba nung Samajwadi Party Tir, Akhilesh Yadav-i, India nung vote maneni auyara India nunga Nepal nung atalokba amaji ataloktsü, ta metetdaksü.

Hokolbarnü Lucknow nung osangbenertem senden ka nung jembidang Akhilesh Yadav-i, Nepal nung yimtenren tensa raksaa longkak aیتba mapang nung nisung 50 dak tali süogo aser sorkar kiojen jenti raksaogo, ta ashi.

"Vote auyaba ya manenra kidanger linüktem nung nüburtem lenmang nung ketdangsüa agitsüji parnok

aittsü, iba ama tensaji yangia ataloktsü akok," ta pai ashi.

Nepal nung longkak aیتertemi minister tem kiojen, Parliament aser Supreme Court building densema kiojen aika rongdoktsüogo.

Nepal nung dang masü Afghanistan, Pakistan, Sri Lanka, Myanmar aser Bangladesh linüktem nunga nüburtemi longkak sashia aita sorkar atsüngdokba tatalokbatem liasü.

Election timi ochishia agitsüla, ta shia Yadav-i, "Mapang shia Supreme Court-i tetuyuba agütsür. Item tetuyubaji Election Commission-i bentshüta ta onoki amanger. Iba (Election Commission) ya BJP indang commission ka makümtsüla. Election shidak ketdangsüa agitsüji parnok

teinyaktsü mapa lir," ta metetdaksü.

Akhilesh Yadav-i, "Tesem kecha nunga vote maoyadaksütsüji Election Commission teinyaktsü mapa lir. Vote auyaba ajanga takok mangutsü ta parnoki metetba sülen parnoki tashiyim amshia vote nokdangtsü merang. Iba ama ya atalokra yangi nüburtemi lenmang nung longkak aیتtsü, aser asen kidanger linüktem nung atalokba ama ataloktsü," ta ashi.

Tesüiba mapang Uttar Pradesh elections nung atalokba metetdakja pai, "Parnoki par kin nungi züngsemtem shim, aser iba mapang nungi presiding officers aser election officials ajakji chief minister'er kin nungi dang liasü," ta ashi.



Ahmedabad, September 12, 2025: Hokolbarnü Nepal nungi meyipa aruba India nunger telok ka Ahmedabad atongba sülen tangokba noksa nung angur.

Linük tesem ajaklen Firecrackers nokdangtsüla: Supreme Court

New Delhi, September 12 (Agencies): Hokolbarnü Supreme Court-i, kechiba firecrackers ya Delhi-NCR nung dang nokdang; mopung menenba nokdangtsü atema iba tenokdangba ya linük tesem ajaklen benoktsüla, ta metetdaksü.

Chief Justice BR Gavai-i, mopung temerük agitsü temeden ya Delhi nung aliba sensotem atema dang masütsüla, ta metetdaksü.

"Firecrackers nokdangtsü süra linük tesem ajaklen nokdangtsüla. Yaküm asükwä mongpu nung ni Amritsar (Punjab) semdangba mapang nung yangji aliba mopungji Delhi nung aliba mopung dang nungia tamajungba liasü," ta pai metetdaksü.

Diwali benjung atongtsü mapang ana nung lia linük tesem ajaklen firecrackers nokdangtsü atema agütsüba temepishiba ken o ka angadangba mapang nung Supreme Court-i linük tesem ajaklen firecrackers nokdangtsü benok.

Supreme Court bench-i Commission for Air Quality Management (CAQM) dang

iba tebilemtsü onük dak sendakba nung telangzüba agüjang, ta tuyuogo.

Temepishiba ken oji benokertem atema jembitsür Senior Advocate Aparajita Singh-i, takartemibo mopung temenen nungi jenbutsü atema Delhi toktsür aoer, ajisüaka tanüngba rogotembo mopung temenen nungi mejenbur, ta ashi.

Tamalen-a Supreme Court-i Delhi-NCR nung mopung menenba nokdangtsü atema tetuyuba aika agüja liasü.

Yaküm December ita nung Delhi nung firecracker nokdanga liasü aser taküm April ita nung Supreme Court-i maneni Delhi aser temeket aliba tesemtem nung firecrackers nokdang.

Taküm May ita nunga Supreme Court-i state tem dang tetuyuba tashi mangaba atema tekümdangtsü metetdakja liasü.

Linük tesem ajaklen firecrackers nokdangra state ajaki tenokdangba ajak shidak bentshütsüa akümtsü; firecrackers yangluba, shibelenba, ayokba aser amshiba atema senchi alitsü.



September 12, 2025 nü Keshod Airport, Gujarat nung Congress lenirtemi Lok Sabha nung opposition lenir, Rahul Gandhi agizükdang tangokba noksa nung angur.

Texas nung India nunger ka tekolak tangzüka lepsset

New Delhi, September 12 (Agencies): Bodhbar anepdang Texas nung motel manager inyaker India nunger arrshi küm 50, Chandra Nagamallaiha tepsetba ken o dak sendakba nung police-i arrshi küm 37, Yordanis Cobos-Martinez puogo.

Police-i ashiba agi, Bodhbarnep Chandra aser Cobos-Martinez na tsünga mangatetep adoka liasü. Chandra Nagamallaiha-i motel nung inyaker ka dang washing machine ji raksaogo, anungji Martinez nem washing machine ji tamshidaksü, ta ashiba nungi rara adoka liasü.

Tena tsünga rarabangsenba sülen Cobos-Martinez-i takdangji yutsür oadok, saka mapang tatsüka

tsünga pai nok ka bener arua Nagamallaiha tekolak tangzüka.

Police-i aibelensangji puogo. US Immigration and Customs Enforcement (ICE)-i, Cobos-Martinez ya United States nung sadem-sadema meyütsütsüla liasü; pa ya Cuba-i meyipa yoktsü liasü saka Biden administration-i tayimtsü peria mali ta shia nokdang, ta aitsü.

Tamalen-a Cobos-Martinez-i US nung ozünga alema aiben inyaka liasü. Gari auyaba atema pa Florida nung anaben pua liasü aser tanur ka dak tim mesüi bentshiba atema Houston nung pa anema ken o benoka lir.

ICE-i pa ya Bluebonnet Detention Center nung puoka liasü, ajisüaka temaba ketdangsertem tetuyuba nung pa chioka liasü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGJUI 13, 2025

Aor tulurtem asentenshi

Tanü Mokokchung nung Aor officer-tem telungjem senden ka ayongzüka akaba ya Ao lima asoshi dang masü saka Nagaland asoshi kanga tongtiban senden ka asütsü. Aor officers tetezü government mapanung ketdangser Aor tulurtem, anungji ibai mechimenu senden ka masü saka yimten tashi aser shisatsü abener tulurtem senden ka lir. Tang asenok aliba ki, Nagaland yaa küm 60 jakdang Naga nung Aor tulur aser tazung temeteteremi anir akümba state ka lir. Iba jagi Naga nung rongnungbo, asenoki asenoksasa tiaksanga meshiaka, maparen ajak nung samanirtem lir. Aji oda, tangar dak alaka Tsüngremi Ao kin moatsü nungji shi temanga kümzük aser tanela tekümteta agütsü aserang ano, temeteter küm daksü. Iba jagi tanübo Nagaand government nung tenzükertem rongnunga tangar dangbo Aotsür Aor teimba sükdangteter. Ibaji Tsüngrem temeim agi mezüng shisa tenük lapoktsüba temoatsü aser maongka lir. Aji oda, küm 30 jakdangbo Nagaland government office nung tzümartem agi amokbanger liasü saka parnok ka khen, ka khen ta mapa nungi anena aodang, asenok Aotsür Aortemiang teimba melentsüsa akümba agi, tanü tashi Nagaland government tenzükertem rongnung asenok teimba sükdangteter. Atangji, tzümartem ali tashi asenok shingaia government mapa nung koba Naga kin nungi teimba ta sükdangtsü tebilema mebilem, saka asenoki tzümartem melenba agi asenok teimba aküm tashi nung nisung aikati Nagaland government nung koba kin nungi nisung kwi government mapa nung aliar metetner. Iba amaji tangari asenok dak tenük yoker. Ajisüaka, alima ya melentepa aliba lima, anungji mezüng Ao kini anir azü dena tenla agüja Nagaland aküm aser government nunga Aor tokolak ser yimsüsüa aru, ajisüaka tangbo tangar kin tokolak ser Nagaland government aoer, aji alima yimya. Kasaji, tanü government mapa nung tulurtema aser tilartema Aotsür Aor teimba liaka, asüngbo tangar kin teimba asütsü, aji tamakok masü, alima yimya asütsü. Iba ama melentepa yimten nung yimsü asüba aser ketdang asüba lima nung, koba kin südir süaka, yimsüsürtem aser ketdangser tulurtem telungjem ka ser mapang - mapang shia ajurutepea pei lima aser nübortem asoshi putu den apet sentong tajung yanglua mapa tulu inyaktsü tangatetba alitsü baji kanga tongtiban lir. Iba nüngdakji apiteta, tang Aor tulurtemi parnoksa lungjemer pei lima nung arok senden ka ayongzüka ya Ao kin asentenshiba sentong ka asütsü. Atangji, Officer-tem telungjem tenteter ta asü dang, asenoki aiben parnok longjemer rongsen agi lokti aser arogo yaritsü atema tentet amai imlar, anungji jet ta sentong kar asoshi tenla 'donation' meshitsüang bilemer. Ajisüaka, government mapa nung inyaker tulurtem adenshibaji parnok sarutepea telok aser arogo nem tenla agütsü asoshi masü saka nübortem nem shisalen tajung sayua, parnok ama lanurtem rongnungi tulur akümtsüsa adokdaksütsü aser ano government mapatem dang nungibo tajungba aser tuluba 'entrepreneurship aser business' lenmang tapu balala sayua lanurtem takar küm daksütsüsa yariteptsü asoshi longjemba telungjem ka asütsü. Aji oda, Aor Officers Telungjem ya nübortem nem ango agütsüba telok ka masü saka ango aputsüba inyakyim aser lenmang sayuba tesayur telok ka asütsü imlar. Atangji, government nung ketdangser tulurtemji government kolok lir, anungji Aor tulurtem shisatsü aser temetetba nungi adokba agi Nagaland government nunga inyakyim, policy, tapu balala lateta inyaka aotsüsa tulurtem rongnung shisalemsatepea jembishinü aser zülushira nung yariteptsü baji kanga tongtiban asütsü. Ibaji state government asoshia shisatsü aser teyari angudak tajung ka akümtsü. Joko, asenoka tokolak aser shisatsü ulushir, shisatsü aser tokolak tila adener yimsüsüri pei yimtsüng asoshi dang bilema inyakba ama mesüi, Aor Officer temibo Ao lima rangben ya pei yim aser Nagaland ajunga ya pei lima ta bilema shisadangtsü, sentong atongtsü aser arok ser mapa kuma inyaktsü tangatetba aser temulungtetba nung apusoa oa angur. Aji oda, government atema shisalen teyuba nung, ochishia, ajemalua aser nendaka inyakba nung ajak atema tatishitsü tajung kuma inyaktsü asoshi Aor tulurtem asentenshiba anogoji tanü südakjangma !

OLEMSABANG

Ali Oset Bendenba Agi Taküm Maitsü Yanglutsü Merangba Putu Ka Nung Tamanger Jenjang (The Fate of a Believer in a Culture of Consumerism)

Tiatoshi Longkümer, Kohima

(Yashi adok nungi...)

Program ajak kanga sentsüpranga inyak nung ang tangar nuburtemi asen arogo kanga indar ta ajitsü amai belema inyakba sendongtem joko Aoli arogo nung kanga inyaker. Anungji colourful sendongtembo ajak newspaper nung agütsütsü tokteper aser iba yongji newspaper tem free column nung secular ads dang nungibo church ads ang teimba kuma odagi. Ano tekülem nung shilem agirtemia joko aiben chichiba tekülem yimyato toktsür pei shilemji tangar dang nungi koda balaka asütsü ta bilema inyakba aika lir. Iba yongjiang aiben youth sentepem nung tenlaki tajung, lighting system, sound system, aser refreshment kanga tongtipang süa akümer. Aser ministry nung sen makai kecha meinyaktetsü ta bilema joko arogo khuret aser security tulutibaji tamang masü joko sen kümogo. Item tatishitsütem ajak ya consumerism sobaliba nungi adokba tangatetbatem asünung, asenok ajak kanga küm kumshia alitsü nungdaker.

Consumerism ya tekela aser tashi ain tulu asünung Pauli Efesia 6:10 nung ashiba ama asenoki "mojing külakoktsüba anema noktaksü asoshi Tsüngremer raraba sobutsü ajak sobutsüla. Kechiaser asenoki azü aser shi anema memelangteper, saka tongtiban tem anema, aintem anema iba amang lima yimsüsürtem anema, anung tema nung tanela tamajung alibatem anema asenoki melangteper" ta ashiba angateter.

LAISHIBA ASER CONSUMERISM:

Mark 10:17-31 nung takar asangur ka Yisui ajuruba otsü zülua lir. Lai jagi ashir, iba takar asangur ya tamangba yimsu nung keta-sena aliba nisung tajung ka, saka pa asoshi rongsen meimbaji kanga tulu liasü. Iba takar asangur asoshi tasaktiba mapaji Yisui ashiba ama, ali rongsen ajak sensaker nem lema agütsür, rongsen makai Yisu sülen anitaksü baji liasü. Pa akaba ajak bener Yisu sülen anitaksü aja asübo pa koda pela anitakla. Saka rongsen dak temolung yur teti tatem maka senmang bushitsü Yisui memela nung pa teyimla ajak samar jashiseta Yisu nungi pila aser pei rongsen dangisa meyip.

Iba takar asangur jakla yagi tanü putu nung tamangertem kanga mesüka tatishitsü sayur. Aikati tamanger-a tajung sünür aser rongsen aika kanür. Yisu Khrista dak amangakasa, ano rongsen makara taküm jenokdak (security) maka ta bilemba putu ka nung asenok alir. Nungdakba rongsen aser osettsüset akabaji tai masü. Saka Tsüngrem dang nungi ali oset aser rongsenji tongtipangba aser tepelatsü tuluba küm daksüra ibaji kanga lendong tulu lir. Laishibaibo ashir, "Nisung kati kibur ana metenzüktet," rongsen mesüra Tsüngrem shimtsüla. Kechiaser kong ne rongsen lir, yangji ne mulung alitsü" (Mathi 6: 19- 21).

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agatsü mepishir

Oklahoma nung UniteUS sentong nung kaketshir 9,000 aden



September 09, 2025 nü University of Oklahoma indang basketball arena, Lloyd Noble Center nung UniteUS sentong nung adenertem noksa nung angur.

September 12, 2025: Tesüiba anogo ishika tejaklen Oklahoma nung UniteUS sentong nung kaketshir 9,000 dak tali aden aser kasa sentong nungjisa aika baptia liasü.

Iba sentong nung kaketshirtemi Tsüngrem külemba den külemi tatok meshia liasü.

Mongolbar aonung (September 09) University of Oklahoma indang basketball arena, Lloyd Noble Center nung kaketshir 9,000 dak tali adenshia Tsüngrem külem.

Küm ana tejaklen US nung UniteUS movement tenzüka college/university campus aika nung item sentong ayongzüka agiogo aser kaketshir meyrjang aikati Khrista nem taküm bendanga agütsüogo.

Ano Ohio State nunga football team kati "An invitation to Jesus" ta ser sentong ka

ayongzüka agi. Iba sentong nungji football asayartem- Caleb Downs, Sonny Styles aser Luke Montgomery nungeri taküm kuli lemsatep aser aikati Khrista agizük. Kasa sentong nungji kaketshirtem aikati baptia liasü.

Julian Goines-Jackson-i X ajanga, "Football ya Honibar anogotem nung nisungtemi reprangba saisapong ka dangbo masü; iba ya takok anguba mesüra tamakok anguba indang masü, mesüra national championships indang masü. Iba ya Khrista osangtajung lemsateptsü atema Kibubai asenok nem agütsüba sabang ka ama amshitsü atema lir," ta ashi.

Yaküm-a iba University Campus nung college football National Champions mapang nung evangelistic sentong ka agia liasü.

Taküm küm tetenzüklen

UniteUS lenir, Jennie Allen-i social media ajanga, "Asentenshi milak ka tenzüker asü masüar ni memetet, ajisüaka yangi asentenshi lir. Asen meketa aliba lima ayimjemtsü atema Tsüngremer tajaba tashi angaa kodang asenoki 'hai' ta langzüdir idangji tanela asentenshi milak jangrutsü akok," ta metetdakja liasü.

Taküm asükwa mongpu matongdangsa evangelistic sentong agitsü atema school teneti UniteUS jaokogo.

September 25 nü South Florida nung UniteUS sentong agitsü, September 30 nü University of Tennessee nung, October 21 nü Grand Canyon University, November 5 nü Cincinnati nung, November 11 nü North Carolina state nung aser November 18 nü Clemson nung UniteUS sentongtem agitsü.

Iraq nung Khristantemi Tsüngrem tenüng sanga benjung among

September 12, 2025: Iraq nung US-i Saddam Hussein-i aniba sorkar atsüngdokba mapang nungi tenzüka tesüiba küm aika Khristantemi timtem balala ajangshia aruogo; telok balala tsüngda rara, ISIS kiralongrartem aser tanga kiralongrar telok balalai timtem agütsüba ajanga Iraq nung Khristantem aika jenshiogo.

Iraq nung Khristan nütsüng million 1.5 shi liasü saka tangbo 2,50,000 shi dang lir.

Kangki tashi indang sangdongba den külemi linük nung Khristantem mesamaba atema Tsüngrem nem tenüngsang agüja benjung amongtsü atema northern Iraq nung Khristantem longjema liasü, ta osang ka ajanga metetdaksü.

Assyrian Church of the East, Chaldean, Syriac Catholic aser Syriac Orthodox Arogotemi longjemer iba benjung ayongzüka among.

Khristan melungtet telok, Aid to the Church in Need (ACN) den jembidang Chaldean Archbishop Bashar Warda-i, "Iba benjungmong amongba mapang ya kanga tongtibang

mapang ka lir, kechiyong küm ter tejaklen Daesh [ISIS] kiralongrartemi iba lima nung Khristan yimsü samatsütsü meranga liasü," ta metetdaksü.

"Tanübo Khristantemi lokti aliba tesemtem Tenla kitem nung tepela nung Kangki ajungkettsür. Mapang ka nungbo Khristan yimsü samatsütsü tebilemba liasü, saka tamang ajanga taküm lir. Teimla ya tasüba dang nungi tashitaitba," ta paisa metetdaksü.

2014 küm nungi ISIS-i northern Iraq tesem tulubaka amokbanga liasü, ajisüaka 2017 küm iba telok maakdoka liasü.

Iba mapang nungji Khristan 120,000 shi Kurdistan region kübok Erbil-i jena ao, ajisüaka tangbo parnok aika pei kidangi shilangba sülen taküm asentenshir yangershio.

Mongolbarnüa Khristantemi Shrine of St Elijah nungi Assyrian Cathedral of St John the Baptist tashi kilometer ana yimdong süa jaja. Iba sülen Assyrian Church of East nung Patriarch Mar Awa III leniba nung tekülem sentong agia liasü.

Khristantemisa kentenmenü den külemi saisapong sentong balala ayongzüka agi. Iba benjungmong sentong ya Honibarnü (September 13) sarasadema tembangtsü.

Sentong ayongzükertemi ashiba agi, Kangki ajungkettsüba benjungmong ya küm shia amongba sentong ka asütsü.

Archbishop Warda-i iba sentong takok ngua agitetsüsa lanurtemi shilem tajung agiba atema pelaba lemsatepa, "Arogotem nungi lanurtemi longjemer iba sentong yanglua liasü. Sarasadem sentongtem, saisapong, asemtepba, kentenmenü, tanurtem saisapong aser sobaliba sentongtem ayongzü. Lanurtemi yaritepba ya ajanga tarutsü atema temaitsü tajung ka sayur," ta metetdaksü.

Paisa, "Iraq nung Khristantem telongjem atangji atalokdar. Kangki ola nungtema meytutet. Iraq nung yirutsüba Arogo tilakai alima dang telongjem tashi, tamang nung tasütait aser shia aruba nung tepela sayutetogo," ta metetdaksü.

ANOGO ABEN TSÜNGREM DEN

Sodom Gomara Tenüng Balala

Sodom aser Gomaraji rongdoktsü aser metsü tzüyim ka kümdaktsü ta laishibai ashir aser ibaji tang tashi lir. Iba dang nüngja balala kin balalai ajaba yamai angur.

1. Hebrew nungeri iba dangji metsü tzüyim ta ajar. Tanü asüng iba dangji anüdoklen tzüyim ta ajar (The East Sea).
 2. Greek nunger aser Roman nungertemi iba dangji Asphaltes ta ajar (tetezü iba nung heavy bitumen tena lir)
 3. Alemli Christian aien senzürtemi iba dang dead sea ta jaa liasü. Kechiaser iba tzüyim nung kecha taküm alitsü makoker. (because no living organism could survive)
 4. Muslim nungertemi iba dang sea of Lot ta ajar
 5. Alima kin balala ungi tashidak balala aketer jenti sentepa taneptsü bushir.
 6. Yisu marudanga iba taneptsü ayong ta züngshia liasü.
 7. Herod chuba tasütsüanasa shiranhdanga taneptsü bushia aru ta ashir.
 8. Emporer Vaspasion iba tzüyim reprangi aru aser pai kanga süngmanga repranga liasü Nisungtem tzüma nung pungdaka alibaji ngua pai tzüwa mashirtem kar teka alener tzüyim manungji enoktsüdang ta otzü zülurtemi ashir. (by Flavius Josephus Wars of the Jews)
 9. Iba tzüyim nung yimti kwi sama tanü tashi tashitemeteteri magizükteter. Aji saka otsü zülur Strabonibo yimti ter asem ta ashir. Aji saka lipok kaket nungbo Sodom aser Gomara dang aiben shisema angur.
- Iba Sodom aser Gomara ya Abraham o Lot na ali alemdang Loti ali temo alidak lenden lima shimtet Lipok 13:10-11. Pa masüdangsa iba lima samatsüba laishiba nung angur, anungji iba lima yakta dang (develop) renloka aoba lima ka ta angateter. Iba lima nung temeshi nisung aikasa alitsü ta Abrahami bilem. Anungji pai teküboktibai lua bilemer temeshi nisung tenem lira mesamatsütsü mepishi. Aji saka temeshi nisung ter danga maliasü. Anungji iba yimti samatsü Lipok 18: 28-32

Arogotemi maneni Gaza atema 'Day of prayer' ayongzüker

September 12, 2025: Iba anogomong atema Churches Together teloki Jerusalem nung Anglican Archbishop, Rev. Hosam sarasademtsü ayongzüko; UN World Peace Day anogomong nung Khristantem dang Gaza atema sarasademtsü parnoki mepishia metetdaksü.

Churches Together organisation-i Christian Aid, Embrace the Middle East, Sabeel Kairos, All We Can, Quakers in Britain, Reconciling Leaders Network aser Difference den senteper Gaza atema sarasademtsü ayongzüker.

Khristan teloktemi senteper külem sangdong ka ajanga, "Palestinian Arogo nung lenirtemi yimjung atema ayimdenba ola ya alima nung Arogotemi angashiogo. Anungji asenoki temeim aser ochi agi telangzüba agütsütsüla," ta metetdaksü.

Gaza atema 'day of prayer' ji Amongnü September 21 nü asütsü.

Jerusalem nung Anglican Archbishop, Rev. Hosam Naoum-i sarasadem lenitsü atema sarasadem ka zülua lemsatepogo.

"Kibuba, Gaza nung alirtem ajak shi-mang atema chiyungtsü moajang aser tanela aintsü atema kodaker chiyungtsü agüjang. Nü tanela tashi ajanga iba rara tekeraba nung anentsü, pua alirtem ajak chioktsü, shiranger aser yirua alirtem aneptsü aser mangyimertemi tesünep angutsü atema sarasademer. Nü Chir, ozü Kibuba Yisu Khrista alima nung taküm aliba mapang Pa tenzüka mapa inyakba, iba tesem nung teti atema tesünep alitsü asoshi lenmang lapokjang," ta Archbishop-i sarasademba lemsatep.

Church Together-i Arogotem dang minute 1 shi mokremer akhüm agütsütsü mesüra sarasademtsü mesüra lumitsü mepishia metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tetushi

(adv) tenüsang agütsüba, temai ajungkettsüba (honour, praise)

* Tongpang rara nung takok angurtemi tetushi tulu angur.

Tetutetba

(adj) ali telung nung aliba tua agitetba (excavation)

* Israel lima nung akhi mapang amshiba osettem tetutetba aika wazüka yua lir.

OLONG PAITEP # 7269

1	2	3		4		5	6	7	8
9				10					
11								12	
13				14	15		16		
17			18				19		
	20				21				
22									
23					24	25		26	
27					28				
29					30				

TIPIEN

- Süngdong ali nung meinok (5)
- Tenuk asungba langka (4)
- Arung ta ashi (3)
- Sü takalen itaka ayu (6)
- Matar/ meperir (5)
- Kiset ozü tapu ka (2)
- Ani entsü agütsü (3)
- Teka agi sotak (6)
- Tenuk saker ali (6)
- __ __ ang (alu jendang lir) (3)
- Pongu anasü (3)
- Süngzü agi longra (5)
- Nok agi meyiru (6)
- Long mekupshi (4)
- Lenmang nung lao (5)
- Jenang aketba shiruru ka (2)
- Telok ka/ angko ka (4)
- Mebilemteter (4)
- Mesakba nung mimshia (5)

LANGTSÜNGLEN

- Teti bilemteter (5)
- Nisung ajak peritsüsa ta ashiba (10)
- Tanangbosa masü (8)
- Yong agi ano malen (5)
- Terok mesaka ola adok (4)
- __ __ mulung suang (2)
- Ajurutsü kazüa liner (6)
- Alu mesükba shiruru ka (8)
- Ashiba meinyakra (7)
- Pa sulen oa (7)
- Yong agi alener (6)
- Tekup meintok (4)
- Mersü o ngashi na menünga (3)
- Tekolak atangba oset (3)

OLONG PAITEP # 7268 TELANGZÜBA

TIPIEN :

- Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

- Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NAI-A YA METETTER MA



YouTube nung nisung teimtibai yoga live stream reprangbaji 246,252 liasü aser iba otsü ya Nagpur, Maharashtra nung HABUILD Yoga Everyday (India) ajanga yanglutet. Iba livestream ya Yoga instructor Saurabh Bothra-i anir agi.

PM Modi-i Manipur semdangtsü jakdang prangpong-injang aika apu

Imphal, September 12, 2025 (Agencies): Prime Minister-i Manipur semdangtsü aliba jakdang Assam Rifles aser CRPF sepaitemi Manipur police den yaritepa mita aodang bunker ka raksatsüogo aser prangpong-injang aika ngutetogo.

Tesüiba ghonda 24 tsündga parnoki district ana-Kangpokpi aser Jiribam nung mita ao.

Osang tejangja ka angazükba nung ajemdaker mita aodang Manipur-Assam arrtsülen tesem ka nung

prangpong-injangtem yua aliba angu ta Manipur police-i metetdaksü.

PM Modi-i September 13 nü Manipur semdangtsü aliba jakdang joint team-i iba mapa inyak ta parnoki ashi.

Assam den arrtsütepa aliba Sonapur aser Jairolpokpi yimtsüngtem nung mita aodang SBBL gun, country-made muzzle-loading SBBL guns, .22 pistol aser tanga osettem angu.

Maneni, joint team-isa telungpurtemi yanglua aliba bunker ka raksaa endoktsü.

Brihostibarnü Leimakhong-

PS, Kangpokpi district kübok Lambung hill nunga parnoki ozüing alema kiojen kar yanglua aliba raksatsüogo.

September 11, 2025 nü sepaitemi Kanglei Yawol Kanna Lup (KYKL) züngsem ka apu. Osang tejangja kar nung ajemdaker sepaitemi Lamsang Makha Leikai nung Moirangthem Ranjit Singh (43) apu.

Pa ya KYKL züngsem ka lir aser tashiyim agi sen saruba aser tashiyim amshia loan recovery ken o tem inyakba atema pa apu.

Imphal nung PM Modi pelaa agizükitsü renemogo

Imphal, September 12, 2025 (Agencies): Prime Minister Narendra Modi-i Honibarnü Manipur semdangtsü aliba atema Hokolbarnü Imphal nung billboards, banners, aser welcome gates enokogo.

Manipur nung kin o kin tsüngda rara adokba sülen küm ana tema süiba sülen PM Modi-i tang mezüng atema semdangtsü.

PM Modi-i Rs 8,500 crore alang mapatongtem atema lung azüngtsüba den semzüksütsü. Pai Rs 1,200 crore alang

mapatongtem semzüksütsü aser Rs 7,300 crore alang mapatong tasentem atema lung azünga ayutsütsü.

Modi-i Imphal tiyongtsü nung aliba Kangla Fort nung lokti sentong ka nung o jembitsü.

Imphal airport nungi Kangla Fort-i aoba lenmang nung BJP state headquarters anasa "Welcome Shri Narendra Modi ji" ta ser welcome gate tulu ka yanglua lias.

Maneni, Sanjenthong aser Nupi Lan complex anasa billboards yuja lir.

Airport nungi Kangla Fort tashi kilometer 7 talang lenmang anatsülen atsü yangluogo aser lenmang merükmejuba mapa inyakdar.

May 2023 nung kin o kin tsüngda mepetmesü adoka raraba sülen Prime Minister-i Manipur khen dang mesemdanger ta opposition teloktemi aija arur.

Kuki aser Meitei nunger tsüngda rara adoker arudang lendong balala nung nisung 260 tema taküm samaogo aser meyrjang aika talidak toktsür ogo.

State cabinet-i Gaurav Gogoi indang SIT report meyipa reprangtsü

Guwahati, September 12, 2025 (Agencies): MP Gaurav Gogoi-i Pakistan den sendaktepba ya 96-page document ka lir ta Assam Chief Minister Himanta Biswa Sarma-i Special Investigation

Team (SIT) report indang ashi. "Iba telok yagi asen linük nung terenlok mapa tenüng menüksütsü atema inyak. Iba telok nung Pakistani senso ka aser MP kinungtsü British tsür nati tongtipang shilem agi" ta

Sarma-i ashi. Bodoland Territorial Council (BTC) elections agiba sülen cabinet-i iba report meyipa reprangshitsü aser teinyaktsü inyaktsü ta CM Sarma-isa ashi.

Ulfa(I) tanishir Mriganka Asom-i Arunachal nung temai adok



Buddheshwar Gohai ta ajar aser pai MQ series rifle den injang aser hand grenade ka bener sepaitem tsüngdang temai adok.

Mrigank Asom ya Tinsukia police ket nung lir aser parnoki asüngdangya südar ta osang angazüker.

Mrigank temai adokba ya Ulfa(I) atema tetsükdaksü tulu ka lir kechiyong Rupam Asom temai adokba sülen pai Assam-Arunachal nung maparen ketdangsüa inyaka aru.

Rupam Asom aser Mrigank Asom nati Assam-Arunachal tesem nung mapa aika inyakogo.

Ulfa(I) tanishir Rupam Asom apuba sülen sepaitemi osang aika angazük aser parnoki Ulfa(I) züngsemtem aputsü atema bushitepa arur.

"Rupam Asom apuba sülen Ulfa(I)-i lenisüba nung timtem tulu ka ajangshia aru. Rupam ya Ulfa(I) commander tematiba ka liasü aser pai Tinsukia, Arunachal nung mapa aika inyak. Saka pa apuba ajanga Ulfa(I) lenisüba tashimait kümogo" ta police ketdangsür kati ashi.

Dibrugarh, September 12, 2025 (Agencies): Ulfa (I) lennir Mriganka Asom (Buddheshwar Gohai)-i Assam-Arunachal arrtsü anasa sepaitem tsüngdang temai adokogo.

Osang ka angazükba sülen Assam Rifles aser Tinsukia police iba tesemi ao aser

Mriganka Asom apu. Pa ya Rupam Asom den tesentaktep tajung aliba nisung ka lir.

Mriganka Asom ya küm 15 tashi Ulfa (I) nung züngsem arur aser 779 camp nung operational commander inyak. Pai April 2010 nung Ulfa (I) züngsem aküm.

Mriganka Asom dang

Ukraine-i Russia dak drones 221 khaloktsü: Moscow



Moscow, Rongjui/Sept. 12 (Agencies): Ukraine-i ozü litsü leni yokba drones 221 khazüka yokogo ta Russia-i ashir, koba May ita sülen anünglen nungi kanga sashia amakba rongnung ka alitsü.

Drones ya tesadang ka dak tema Moscow south-west tsütsü Bryansk aser Smolensk region tem nung nokdang, kong Lukoil facilities nung tenük yokba lir ta defence ministry ajanga ashi.

Leningrad region nung aliba ketdangsür temi drones 28 khazüka yok aser Russia indang oil terminal tulutiba, Baltic port of Primorsk nung rong ka nung mi adok ta ashi. Asü-amaba mesüra totzü yimshiba makai mi ya remseptet ta parnoki ashi.

Kasa mapang Ukraine indang Sumy region nung aliba yimtsüng ka nung Russian glide bomb ka apokba nung civilian ana asü ta ketdangsür temi ashi.

Kaluga, Novgorod aser

Moscow densema Russia indang region toku shi nung drones nokdangba osang lir, kong drones toku raksatsü ta ashir. Tesem aika nung drones teraksa liasü, saka Russian ketdangsür temi nisung asü-amaba mali ta ashir.

Bryansk nung bus ka nung drone ka yokba nung civilian pongu aser mitkar ana yiru, ta region indang Governor Alexander Bogomaz-i ashi.

Brehostibar aonung amakba ya ita pezü tsüngta Ukraine-i anünglen nungi bomb pokloktsüba tesashitiba rongnung ka alitsü ta ashir.

Russia-i May 7 nü drones 524 raksatsü ta ashir. Tawa Russia-ia drones 818 yok, ta Ukraine ketdangsür temi ashir.

Russia-i küm asem ser tesadang jakdang nungi tashi ajak amshia Ukraine amak tenzüker Leningrad region nung tesashitiba amakbaji Brehostibar aonung ya alitsü.

Iba yongji St Petersburg nung aliba Pulkovo airport khen asoshi shibanga liasü.

Arütsü alema drone yoka amakba ya tali kumogo. July ita nunga Ukraine-i drone amshia amakba ajanga Moscow nung aliba airports ajunga khen asoshi shibangtsüsa akum.

Tawa Ukraine-i Russia nungler litsü telungba nung aita amaker, arütsü nungi miles noklang aika pilar refineries, fuel depots aser osettsüset ayuba tesemtem nung kongshir.

Moscow-ia meyi mapang Ukraine nung yimti aser energy facilities nung missile aser drone amshia amakba tali kumogo, aser US-i anir yimjung tezüngzüktep asoshi inyaktepba nung terenlok makai anendaka lir.

Russia aser par tembar Belarus tsüngta joint military exercise ka Hokulbarnü tenzüksü lia Ukraine-i drones ya yoka liasü.

Nepal nung interim government tenzüksü renemer

Kathmandu, Rongjui/Sept. 12 (Agencies): Linük tesem ajunga nung azüdokshia longkak aitba ajanga Ato Kilonser K P Sharma Oli mapa nungi atsüngdokba sülen interim government tasen kati Nepal nung yimsü asütsü renema lir.

Chief Secretary Ek Narayan Aryal-i anir team kati building management reprangshima liasü. Singha Durbar nung administrative maparen yakta tenzüksü, koba longkak aitba mapang mi senloksü aser iba longkak aitba mapang nisung 50 shi tepseta liasü.

Nepal indang taoba Chief Justice Sushila Karki ya interim government nung tekolakba akumtsü amai lir. La ya Himalayan linük nung tetsür ato kilonser mezüngbuba akumtsü.

Constitution tsütsü mangatettep adoka aliba tembangtsü asoshi Sheetal Niswas nung aliba President's Office nung tongtipang senden ka amenba nung Nepal Army chief General Ashok Raj Sigdel dena liasü. Gen Z nungi teshimtet nisungtem, Tir Ramchandra Paudel aser Nepal Army chief tsüngta sentong balala atema jembishinütsü asoshi senden aika mena arur.

Iba senden nung Karki, Kathmandu Mayor Balendra

Shah, Nepal Electricity Authority indang taoba CEO Kulman Ghising aser Mayor of Dharan Harka Sampang nungler tenüng benoka liasü.

Lanurtemi anir azüdokshia longkak aitba sülen Mongulbarnü Oli mapa nungi anen aser iba sülen Nepal Army-i linük tesem ajunga nung tenokdangba balala benoka liasü. Hokulbarnü linük tesem ajunga nung tensa junga kumogo, ta ketdangsür temi ashi.

Tir Paudel-i Oli indang resignation agizük saka Council of Ministers tasen ka mekumtet tashi pai (Oli) anir aliba cabinet-i sorkar ketdang asütsü ta ashi.

Kasa mapang Army temi yimden agia monarchy tanaben amenoktsü amai lir ta osangtem prokshiba sülen Nepal Army-i sangdong ka nung nüburtem dang iba osang nung mamangtsü ashi.

"Nepal Army den sendaktepa tiazü jembiba, bilemba aser asadangba nung tamang," ta army temi sangdong ka nung ashi.

Hokulbarnü police odongtar Binod Ghimire-i, tan hopta tenzüker tang tashiung longkak aiter nisung 21, tepuokdak alir nisung toku, police officer asem aser dangar 18 tepsetogo, ta ashi. Kasa mapang nisung 1,300 yiru, ta paisa ashi.

Brazil indang taoba tir Bolsonaro küm 27 tepuokdak ayutsü



Brasilia, Rongjui/Sept. 12 (Agencies): Brazil indang taoba tir Jair Bolsonaro-i mitkar tashi amshia sorkar atsüngdoktsü merangba nung aibelena aliba ngutetba sülen tepuokdak küm 27 ser ita asem ayutsü obendang agütsüogo.

Supreme Court indang obendanger pongu-i taoba lenir aibelena aliba nguteter ghonda ishika tsüngta obendang ya agüja liasü.

2022 election nung Luiz Inácio Lula da Silva-i takok anguba sülen pa yimsüsüba menden nungsa alitsü nükjidong nung tasa tamajung yanglu ta obendanger temi ashi.

Obendanger pezüi pa aibelena aliba ngutet aser kati pa medenja vote agütsü. Bolsonaro indang okatsüri iba

temerenshi ya tera tali ta ashir aser parnoki "appropriate appeals" benoktsü ta ashi.

Supreme Court ajanga pa 2060 tashi public office atema metokteptsü tenokdangba agütsü - koba pa temerenshi tembanger küm ti tashi alitsü.

Bolsonaro ya tayimtsü nung senzütsü timtem ta takzütetba sülen 'house arrest' nung yua liasü, aser ken o tatabangba jembidang maden.

Ajisüaka pai taoba mapanga ibai 2026 tir election nung metoktepdaktsütsü tasa lir ta shia lir - ajisüaka ano ken o danga kar nung pa public office asoshi tenokdangba agüja lir. Paisa ibai "witch hunt" lir ta ashir.

Pai jembiba ama US Tir Donald Trump-ia jembia lir,

shibai Brazil nungler osettsüset nung tariffs shilem 50 meshir aser ibai Bolsonaro anema inyakba mechi tayang kepzüka lir ta ashir.

US Secretary of State Marco Rubio-i, Brazil indang Supreme Court-i tim masüba nung taoba tir tepuokdak ayutsü obendang agütsü ta ashi aser iba 'witch hunt' atema tapet telangzüba agütsütsü ta amokmeren.

Brazil indang foreign ministry ajanga idangjisa telangzüba agüja, US Secretary of State Marco Rubio-i amokmeren o jembiba ya Brazil ketdangsür anema lir aser kuli tejangja aliba senzüka yutsür, saka iba yagi ozü democracy nung timtem majurutsü, ta X nung ashi.

Arishi küm 70 tain Bolsonaro ya arishi tepiyong tepuokdak alitsü ama ajiteter.

Pa indang okatsür temi pa tepuokdaki meyoki house arrest nung ayutsüla aser temerenshi tajemba agütsütsüla ta nokdaksü imlar.

Parnokisa iba obendang jembishitsü ta ashir, saka tzüzüng-ozüng tsütsü mongin temi tamakoktsü asütsü ta shiogo, kechiaser yimya agi obendanger pongu nungi anati

pa medentsü asübo ken o jembishitsü ya takoktsü lir.

Bolsonaro ya ken o pongu nung aibelena aliba ngutet, aser item ajak ya 2022 election nung tamakok anguba sülena maneni tir inyaksü merangba dak sendakba lir.

Ajisüaka prosecutors temi ashiba agi, pai mapang talangka nungi yimsü asütsü tasa yanglu tenzüker liasü aser mitkar tanishir dang tashiyim amshia sorkar atsüngdoktsü asüngdanga electoral system nung temulung melemettsü indang jembia liasü.

Lula aser pa indang vice-presidential running mate aser Supreme Court Justice ka tepsettsü sentong ka Bolsonaro-i meteter liasü ta ashir.

Obendanger temi pai anir tasa tamajung yangluba putet aser mitkar tanishir densema pa den külemi tasa tamajung yanglur nisung tenet aitsü. Item rongnung taoba defence minister ana, taoba itdangiter tekolakba aser taoba security minister dena lir.

Iba tasa mapa kuma inyaksüsa mitkar temi nungi teyari mongutet, saka January 8, 2023 nü Bolsonar bhukumer temi sorkar indang ki o jen sapang, ta obendanger temi

ngutet. Tensa kanga keraa azüok aser nisung 1,500 dak tema apu.

Ajisüaka iba ken o ketdangsüa reprangsang justice Alexandre de Moraes-i ashiba agi, Brazil nung tera agi authoritarianism metenzük.

"Brazil ya tera agi küm 20 nisung ka kijai yimsü asüba dangi meyipa mao ta asenoki tanem-tanemi amadoker, kechiaser yimten yimsüsür telok ka dener mapa tamajung inyakba telok kati elections nung tamakok ajurutsü memetet," ta shia pai aibelenba vote agütsü.

Justice Cármen Lúcia-ia mitkar yimsüsüba kübok Brazil aliba puti otsü süa arua "guilty" vote tasembuba Brehostibarnü agüja liasü.

Züngsem pongu panel nungi kati dang Bolsonaro aitsütsü memulung aser ibaji Luiz Fux liasü, shibai Bodhbarnü ghonda 11 o jembidang Jair Bolsonaro anema tai tongloktsüba ya kuli tejangja maka ta shia pa medenja vote agütsü.

Ajisüaka panel nung tetsür ka dang aliba, Cármen Lúcia-i Brazil indang democratic order lendongbang nung liasü ta nenshia ashi aser authoritarianism nung tatok meliasü, ta ashi.

South Asian International Games nung Nagaland-i gold ti angu

Dimapur, Rongjui/Sept. 12 (TYO): Shankhadol Karate Academy, Jorpati, Kathmandu nung September 10-12, 2025 anogotem 4th South Asian International Games 2025 aliba nung Nagaland nungi athletes temi gold medals ti nguteta liasü. Iba asayamung nung State tenüing nung All Nagaland Shaolin Kung-Fu Association aser Don Bosco Sports Academy, Dimapur Province nati anir dena liasü.

Junior Category:
o Saronthung Christopher Yanthan (Under 13, 45 kg) - Gold Medal, Kata
o Abdul Sahir (Under 13, 40 kg) - Gold Medal, Sanda
o Paramita Paul (Under 14, 55 kg) - Gold Medal, Kata
Senior Category:
o Namlang Zeliang (Under 18, 50 kg) - Gold Medal, Sanda
o Nyurhunlo Kent (Under 23, 60 kg) - Gold Medal, Sanda
o Ayhunlo Jude Khing (28, 70 kg) - Gold Medal, Sanda
Master's Category:
o Razouleu Caroline Sorunuo (Under 80 kg) - Gold Medal, Kata
o Meyiesielie Albert Sorunuo (Under 115 kg) - Gold Medal, Sanda

Davis Cup: Suresh aser Nagal nati takok angu

Biel, Rongjui/Sept. 12 (Agencies): Davis Cup tennis asayamung nung reserves nung alisang Dhakshineshwar Suresh-i Hokulbarnü temaba jenjang nung alir Switzerland nunger Jerome Kym madak straight sets nung takok anguba sülen Sumit Nagal-ia takok ngua India ya away tie nung European linük ka madak takok tangur lir, koba aiben atalokdanga mali. Captain Rohit Rajpal-i Dhakshineshwar dak tamang aka, shiba Aryan Shah jakdang asayadaksü aser 155 ranked Kym madak 7-6 (4) 6-3 agi takok angu. Dhakshineshwar ya ATP charts nung jenjang 626 nung lir, saka pai kanga junga asayatetba den tamang katetba ajanga pa jenjang teküboklen liaka takok angu.

Nagal ya tang top-300 telung nung alitsü meranger, shiba taoba küm top-100 nung dena liasü, aser pai Davis Cup nung meyipa arua asayaba mapang Marc-Andrea Huesler madak 6-3 7-6 (4) agi takok ngua India ya 2-0 agi temaba nung mezüing anogo tembang. India-i European lima nung Davis Cup takok angutsü kanga anasa lir, aser Honibarnü asaya asem nung ka nung dang takok angutsü nüngdaker. N Sriram Balaji aser Rithvik Bollipalli nati Jakob Paul aser Dominic Stricker den asayatsü aser iba sülen ano kija asayatsü. India nungeri Davis Cup nungya Asia nungi Uzbekistan aser Kazakhstan amala akokbabo lir, saka European team tem den asayaba nungbo otsü tamajung dang lir. India-i tesüsa European

team madak away tie akokba ya 1993 küm Cannes nung liasü, kong Leander Paes aser Ramesh Krishnan nati aniba team-i quarterfinals nung France madak 3-2 agi takok ngua liasü. Century tasen tenzüker India-i away ties asayama nung tamakok anguba ya Sweden (2024), Denmark (2023), Norway (2022), Finland (2021), Croatia (2020), Italy (2019), Serbia (2018, 2011), Canada (2017), Russia (2010), Romania (2008), Sweden (2005), Netherlands (2003), aser Sweden (2000) alitsü. India-i Denmark akok, saka ibai 2022 küm New Delhi nung liasü. Huesler ya rank 68 nung lir aser Nagala ya 222 nung lir, saka Nagal-i Davis Cup nung tang tajungtiba asayateta India nem takok ka bener arutsü.

Hong Kong Open: Satwiksairaj-Chirag aser Lakshya Sen semifinal tongogo

Kowloon, Rongjui/Sept. 12 (Agencies): India nunger badminton asayar Satwiksairaj Rankireddy aser Chirag Shetty nati Hokulbarnü Malaysia nunger tarep asayar Arif Junaidi aser Roy King Yap na madak takok ngua Hong Kong Open semifinal tongogo. Rankireddy aser Shetty nati Junaidi aser King Yap na madak 21-14, 20-22, 21-16 agi takok angu, koba ghonda ka dak tema asaya liasü. Seed ti buba nung aliba India nunger tarep ya kanga meilongi tenzüker, saka 12-all atongba sülen parnoki smashes sashia züka parnok den asayar nem maongka kangabo magütsüi tatembang points pongu ashidena ngua liasü. Set tanabuba nung Malaysia nungeri kanga junga asayateta parnok teimla ulushia akum. Tetenzüklen tena points tajemba liasü, aser 6-all ajungba sülen India nunger tarep dang asaya talangba ka tena tajungba asayatet aser Satwik aser Chirag nati 20-all kumtsü. Ajisüaka Malaysia nunger

ana yagi iba asaya junga soita 1-1 akum. Decider nung India nungeri yimya balaka nung asaya tenzüka tatem tashi yamaji asayateta liasü. Brehostibarnü World No. 9 Satwik aser Chirag nati Thailand nunger Peeratchai Sukphun aser Pakkapon Teeratsakul madak takok ngua quarterfinals tonga liasü. Maneni Hokulbarnü Kowloon nung aliba Hong Kong Coliseum nung Hong Kong Open quarterfinal asaydang India nunger badminton asayar Lakshya Sen-i takok ngua semifinal tongtetogo. India nunger kisüing asayaba mapang Lakshya-i Ayush Shetty madak 21-16, 17-21, 21-13 agi takok ngua taküm semifinal tanabuba tongteta liasü. Tena tsüingta minute 66 asaya. Taküm Macau Open Super 300 nung pai tasembuba jenjang tongteta liasü. Iba tamakok ya Super 500 asayamung nung Ayush indang campaign tatembang alitsü. Ayush Shetty, shibai küm

tetenzüklen US Open Super 300 asayamung koka liasü, pai Brehostibarnü Round of 16 nung seed pongu buba nung alisang Kodai Naraoka tsükdaksü. Pre-quarterfinal nung Lakshya-i külen India nunger asayar HS Prannoy madak 15-21, 21-18, 21-10 agi takok ngua liasü. Mezüing round nung pai Wang Tzu Wei madak 22-20, 16-21, 21-15 agi takok angu. Hokulbarnü Lakshya-i mezüing game akok aser set tanabuba 15-16 lia Ayush-i asendenshir asaya. Pai iba sülen points trok kanga ilonga nguteta decider asayatsüsa akum. Set tasembuba nung asaya tiyongtsü ka tashi Lakshya temaba jenjang nung liasü aser Ayush nem maongka magütsü. Ayush-i anaben line alema azük aser Lakshya-i net nung kanga meranga asaya aser yangji pai tajangzüker angu. Quarterfinal danga ka nung seed tasem buba nung alisang Chou Tein Chen aser Alwi Farhan na asayaba nung shibai takok ngudir, pa den Lakshya semifinal asayatsü.

NE OSANG : Tapak 1 nungi...

PM Modi-i tanü Manipur...
"Prime Minister-i alirtem den ajurutepa olemtep semdangba ajanga state nung yimjung arutsü, tensa ajungtsü aser terenlok atema lenmang lapoktsütsü. State sorkar aser India sorkar tenüing nung ni Manipur nung alirtem dang PM pelaa agizüktsü aser sentongtem nung shilem agitsü ayongzüker" ta Chief Secretary Goel-isa metetdaksüogo. Prime Minister Modi-i Manipur semdangba ya tenüing atema dang ta Hokolbarnü Manipur Congress president Keisham Meghachandra-i ashi. "Nübertem ita aika timtema arur, aser parnok rongnung relief camps nung internally displaced persons dena lir. Parnoki yimjung, teyari aser temeten imlaa liasü. PM Modi-i semdangba ya yimjung aser temeten atema asü nungbo kanga tajung süla. Sendaktepa

maliba atema sasar" ta Meghachandra-i ashi. Prime Minister Modi-i Manipur semdangba sülen Assam-i aotsü aser idakji nikongdang 5:00 ako meta Guwahati nung Bharat Ratna Bhupen Hazarika küm 100 ajungba sentong nung adentsü. September 14 nü PM Modi-i Assam nung Rs 18,530 crore alang terenlok mapatongtem atema lung azünga yutsütsü. PM Modi-isa Golaghat nung Assam Bio-ethanol Private Limited, Numaligarh Refinery Plant lapoktsütsü aser Polypropylene Plant atema lung azünga yutsütsü. September 15 nü PM Modi-i West Bengal semdangtsü aser Kolkata nung 16th Combined Commanders' Conference-2025 lapoktsütsü.

STATE OSANG : Tapak 2 nungi...

Kohima nung NCAP indang...
Asen chirnur, aser dang tantsü-tambo aser tarutsü putu asoshi Kohima anüing müreka yuti, ta Kohima DC-i ayongzüker. Iba workshop nung Dr. Riku Khutso, NCS, EAC ajanga 2019 küm NCAP tenzüker maparen balala inyaka aruba aser nükjidong lemsatepa liasü. India indang non-attainment cities tem rongnung Kohima aser Dimapur dena lir, aser jana ketdangsüba densema rongsen aser tebilemtsü ajunga nung nüburtem kibur akumtsü tongtipang lir ta ashi. KPC tir Alic Yhoshu-i o tatsüka jembidang, nisung takum ka anema alitsü asoshi mopung temürek ya tongtipangtiba lir aser mopung müreksü merangba ya khen atema masü saka ajaki teti inyaktsüla, ta ashi. Iba sentong nung KPC shilem agidaktsüba asoshi lai district administration dang pelaba lemsatepa liasü. Iba sentong nung Nagaland Pollution Control Board nungi Scientist B, Yanathung

Kithan-i Kohima yimti athishia mopung menenba indang tejangja rateta ashi. Mopung majungba ya talisa lenmang majungba, gari senzüba, jana-reja tesem teladak nung arongba, gari timba akumba ama mokozü tali akumba, kisü-jensüba nungi lir ta ashi. Paisa kilong nung sorochiok dang süng amshiba nungia kilung nung mopung menentsür ta ashi aser mopung menenba ajanga temang nung timtem aser tashidak balala adokba indang pai rateta ashi. 2026 tashinung pollution level shilem 40 agi ajemtsü NCAP nükjidong lir, aser Kohima nung iba sentong takok ngutetra, tesem ajunga nung takoktsü mapa lir ta ashi. Iba sentong nung KPC tongti zülur Vishü Rita Krocha menden liasü aser KPC züngsem Narayan Bahadur-i melepzüing o jembia sentong tembangba sülen shilem agirtem nem süngdong lema agüka liasü.

DPDB Mokokchung ajanga...

MDFA ajanga 25 buba Dr. Verification Committee tentetba indang osang agütsü aser Rajeshwari Karina School, Tuli tenüing melena Royal Knight School, Tuli amshitsü benokba jembir temaba ketdangsür dangi yoka liasü. Taruba DPDB senden nung Department of Agriculture dang PowerPoint presentation agütsütsü mapa nunglokja senden tembang.

BILEMDANGANG
"Yashi indang bongmang nung dang lira, asenoki tamakoktsü kisüing bongmangtsü."